



李龙潜 杨宝霖 陈忠烈 徐林 点校

明清广东稀见笔记七种

岭南文库编辑委员会 广东中华民族文化促进会 合编

广东人民出版社



图书在版编目 (CIP) 数据

明清广东稀见笔记七种/李龙潜, 杨宝霖, 陈忠烈, 徐林点校.
—广州: 广东人民出版社, 2010.3

(岭南文库)

ISBN 978-7-218-06627-1

I. ①明… II. ①李… ②杨… ③陈… ④徐… III. ①广东省—地方史—史料—明清时代 IV. ①K296.5

中国版本图书馆 CIP 数据核字 (2010) 第 002283 号

责任编辑	沈展云
封面设计	亦可艺社
责任技编	周 杰 黎碧霞
出版发行	广东人民出版社 (地址: 广州市大沙头四马路 10 号)
印 刷	台山市人民印刷厂有限公司 (厂址: 台山市北坑工业开发区)
开 本	787 毫米×1092 毫米 1/16
印 张	23.25
插 页	10
字 数	270 千
版 次	2010 年 3 月第 1 版 2010 年 3 月第 1 次印刷
印 数	2000 册
书 号	ISBN 978-7-218-06627-1
定 价	70.00 元

如发现印装质量问题, 影响阅读, 请与出版社(020-83795749)联系调换。

【出版社网址: <http://www.gdpqh.com> 电子邮箱: sales@gdpqh.com】

图书营销部: 020-83781020 83790604

ISBN 978-7-218-06627-1



9 787218 066271 >

岭南文库顾问

(按姓氏笔画为序)

于幼军 卢钟鹤 叶选平 朱小丹 杨应彬
杨资元 李兰芳 陈越平 林 若 钟阳胜
黄 浩 黄华华 雷于蓝 蔡东士

岭南文库编辑委员会

主 编：林 雄

岑 桑 (执行)

副主编：顾作义 曾宪志

陈海烈 (执行)

编 委：(按姓氏笔画为序)

王桂科 卞恩才 卢子辉 朱仲南 刘扳盛
杨以凯 李达强 李夏铭 李锦全 岑 桑
沈展云 张 磊 陈泽泓 陈俊年 陈海烈
林 雄 金炳亮 郑广宁 胡守为 饶芃子
洪志军 顾作义 倪俊明 黄天骥 黄尚立
曾牧野 曾宪志

附录：历史文献四种

一、明湛甘泉撰《圣训约》

(明嘉靖二十三年刊本)

圣训约序□□ (武克刚)

孔子□：我观于乡而知王□□□易也。予闻斯言，每□□□见为恨，今岁仲夏□□□□本乡子弟多□□□□□□□约□□□愆者数条择□□□□□会父老令为先倡期一卿，皆改为迁善，而归于王道也。今观所行会礼，无过不及以归于中，序坐以齿，解行以齿，尊高年，所以老其老也。首读圣训，次及乡约□□□兄亲诲子弟也。饮□□□不及□纵容□中□□□失也。□□□会简□□□□□为约□□□行于一乡□□□□□□闻之，有天德便可以语王道，少游江门，得同□之学，□其身以成乎。□天德王道之疏，上而朝廷嘉纳，称纯正有本之学，而天下皆知其经济之大略，而况于一乡之教乎？教行于一乡者即其行于天下者也。合远近大小一以贯之，□□□进曰：斯约也。泉□□□□□风动四□□□□盛举矣。公乃□□□□□王道又推而归之圣训，善哉！言矣。盖请书之简端，以永斯约之传焉。异日风俗归厚，盖亦知有自来矣。予曰：“诸老之言诚是也。”遂书之。

时嘉靖甲辰（嘉靖二十三年，1544）岁夏五月之望日，承直郎前岳州通判门生武克刚顿首再拜谨书。

甘泉圣训约序（伍万春）

伍克刚
字春山

士大夫处于乡，则尽乡人之情；处于国，则尽国人之情；处于天下，则尽天下之情。我泉翁先生谢大司马居乡，□□□□给宗族置义阡以葬，□□□□贍田以待四方来学之士。念我乡父老少与之游，壮而与之宦别，今以俸金置饌，延乡耆戚旧宴约，仿乡饮仪节，而真率与焉，似香山之会，而礼意过之。万春获侍旦夕属予约随，予曰：休哉！约也。老获所安，少获所教。主之者，翁也，副之者，我兄春山也。岁以四举，举以四仲先约，躬诣乡宾请焉，至日黎明宾肃焉以集，延入约庭，先之以宣圣谕，其序则以爵，既而延坐，其序则以齿，盖以宣谕则朝廷也，故尚爵；延会则乡党也，故尚齿。始歌皇极敷言也，再歌鹿鸣首章也，歌南山有台首章以乱也。于宾则三酬焉，既而宾主旅酬，而以约训告终。休哉！约也。敬而不劳，易而不怠，礼以情尽而不拘教，以礼行而不弛，是故宣以圣谕，不忘君也，忠也。宴饮以序齿，不恃贵也，逊也。歌以敷言，示王道也。鹿鸣南山乐宾以锡福也，申以训词教民睦也，顺也。忠而不貳，逊而不亢，乐宾锡福，以无教期，以归于皇极。兹约也，夫岂香山之野会者伦哉！胡五峰曰：达则兼善天下，贤人之事业也；穷则兼善万世，圣人之事业也。盖泉翁先生师天下，育青矜，随处体认天理，万世诵之不衰，达行之志不究于时，而幸于吾乡兆焉，其弗容已之哀乎？孔子曰：吾观于乡，而知王道之易易也。孔子反鲁，万世之彝教以明；先生之居乡，孰为不遇也。时嘉靖甲辰蒲月望日，约末半冈生伍万春谨序。

甘泉沙堤

附录：历史文献四种

甘泉沙堤《圣训约·录请起乡约启》

门生伍克刚顿首拜宗师湛老大人阁下，克刚窃见四方来学诸士，吾师各有书院以处之，又出贍田仓谷以食之，恩及远矣。而沙贝一方尤为根本之地，风教之行，实自此始。近日诸老举引领以望吾师之推恩，为桑榆暮景之一乐。盖观感之间，意有在而未敢显言。伏望吾师会诸老立条约，以教一乡之子弟；一乡子弟入于善，则风俗厚矣。会诸老莫若以独冈书院为约所，移待四方诸士余谷，置酒以宴之，略仿古乡饮之遗意而损益焉。每季一会，每会有宴，每宴品物，各有定数，不使过丰，示不在饮食也。会之日，礼生相礼，以齿序坐，宣读乡约，间以歌诗。从容之中，其仪不忒，传示四方，孝弟之心，油然而生矣。况此外又有鼓舞作兴之道乎。然则是会也，非为诸老娱乐而设，实所以正人心，表风俗也。或曰吾乡高年之老固多，皆布衣贱士，恐于斯会无光，有愧于前人也。愚见以为香山以高年不仕为会，司马文正公华以真率为会，会不必同，惟其意也。况吾师得伊洛之正学，具经济之洪才，即孟子所谓其君用之，则安富尊荣，其子弟从之，则孝弟忠信者也。今退休于乡，主张是会风俗之盛，在兹一举，前代所稀见者也。伏乞俯从卑见锐意行之，略推王道博施之恩，大慰一乡诸老之望，不胜幸甚！嘉靖二十三年四月二十九日刚再拜具。

《圣训约》目录

- 一曰读圣训
- 二曰燕约宾
- 三曰尚礼仪
- 四曰恤患难

五曰立臧否

六曰行保甲

七曰亲巡省

乡约宜歌诗

皇极敷言

呦呦鹿鸣

南山有台

约燕讲章六条

圣谕讲章

宣谕讲章

皇极敷言讲章

鹿鸣讲章

南山有台讲章

孟子死徙无出乡讲章

圣训约姓氏

主约：湛若水，字元明，号甘泉，南京兵部尚书参赞机务，致仕。

副主约：伍克刚，字济柔，号春山，岳州通判，致仕。

约正：伍万春，字收之，号半冈，年六十一。

约副：湛瀚，子文恩，号东翠，年六十五。

乡正：伍祖惠，字汝学。

乡约宾

湛汉：字文渭，号钓隐，年九十二，寿官。

莫清保：字□□，号竹隐，年九十。

湛浚：字□□，号环清，年八十七。

湛昶：字□□，号比庄，年八十六，寿官。

伍裔：字继先，号乐善，年八十五，寿官。

招车明：字□□，号涌潮，年八十四。

林二：字□□，年八十四。

湛靖：字德恭，号东宇，年八十二，寿官。

湛孟辛：字景春，号处乐，年八十二，寿官。

湛钊：字惟明，号行素，年八十一，寿官。

梁观奴：字德恩，年八十一。

何安：字伯宁，年八十一。

黄三友：字□□，号槐轩，年七十九。

区贤：字邦达，号行让，年七十八。

伍宁：字世雍，号拥翠，年七十七。

湛伯灏：字祐之，号赤岩，年七十六。

何大厚：字德纯，号前溪，年七十六。

姚玟：字□□，号珪逸，年七十六。

钟顺：字德绍，号□□，年七十五。

黄区：字佰直，年七十五。

湛浚：字德远，号梅冈，年七十五。

温智：字子慧，号平南，年七十三。

区浩：字庭悦，年七十二。

湛功成：字文遂，号恒直，年七十一。

姚坚：字景昭，号石山，年七十一。

温枢：字伯几，年七十。

伍庸：字尚伦，号前峰，年六十九。

黄英：字子秀，年六十九。

温净：字宗素，号乐轩，年六十八。

伍玺：字邦信，号后峰，年六十八。

温谏：字文忠，号怀朴，年六十八。

湛钦：字惟寅，号惕斋，年六十三，恬退冠带。

熊裔：字通远，号万松，年六十二。

洪璉：字宗明，年六十。

熊文统：字汝成，号戒轩，年六十。

一乡约执事

通赞二人湛天润、湛绍鸣，接二人湛必进、湛承巽，介二人湛从泗、湛光宇，读圣训、读乡约一人湛至公，供香案讲案二人湛舆、湛轼，讲书二人湛来之、湛必进，歌工四人湛应闾、湛彦明、湛乙、湛承巽，司钟磬一人湛应流，司鼓一人湛百湖，举酒六人湛湘之、湛舆、湛轼、湛承泽、湛百湖、湛栳，司籍二人湛绍明、湛光宇。

一乡约席品

设卓二十张，稍仿合食之数而加之。每卓果櫟三，菜櫟二，饌肴四，酒一坛，已上费皆出白石贍田义仓。

一乡约合用器皿

歌钟一，歌磬一，皮鼓一，讲鼓一，香炉一，烛台二，花瓶二，酒壶四把，磁盘盏五十副，汤饭碗八十个，箸五十双，卓子二十四张，长凳二张，椅子五十张。

圣训约

主约者副主约者前期旬日，以书躬诸各乡老乡正之家，与约者敬礼请焉，书云：水等议以为古之欲化教其乡里子弟者，必自父老始。盖父老乃弟子之素敬信者也。故礼高年，敬其父老，则其乡邻子弟莫敢不悦服，而信从焉。吾乡故为名乡，而乡里子弟往时或有不循礼法而习为不善者，非其性之本然也，盖前此未有教化之道，故往往习于恶，罹于刑而不自知，临时悔之晚矣。吾甚悯焉。今与各方父老立圣训，约定于四仲之望日，会于独冈书院，恭读圣训、宣谕各一遍，人人各相诚愉归，各管束其宗族邻里子弟，语以为善之福，为恶之祸。使人

人各知保全身家父母妻子。是日，置蔬馐薄饮，合欢同乐而罢。凡会坐以齿为次第，不论贫富上下，以道义相孚，使风俗还淳，庶少有补于圣明之化理，则白沙先生所谓此地还成礼义乡。岂不美哉！岂不美哉！兹特从众推举，咸谓公正为人取信者，莫如足下。谨预诣庐下沥诚敬请焉。伏冀照亮，惠然俯临，共成盛事，幸甚！幸甚！及前期一日遣价送请帖于同约父老、同约者及乡正、乡老，及乡正答曰：诺。敬如命，价归以报二主约。曰乡老、乡正已诺矣。约之日辰刻，主约者、副主约者，先往约所，宾前后至，息于祠堂，候报齐，主出迎，主约东阶，宾由西阶，约正副随之入门揖，及阶揖，升阶揖，乃升堂，北向相揖，举手揖，各即应坐之位，座皆先帖云某人位，宾不劳虚让，礼贵简实，且老者不以筋力为礼也，一切礼让繁文皆宜略去，以存诚敬。凡约宾相继来者，礼亦如之。乡正是日以所旧立乡保甲大小牌面来示礼，接亦如之。保甲人不必来，恐扰之。

曰宣圣训。先期设香案朝西北，以待跪听宣圣训，宾主稍坐，待约宾皆至，引礼生引就香案之南，有官爵者以次在前，其余以齿为次就位。盖在朝廷礼宜以爵也，乡宾甚老不能拜跪者，优之避坐于别所。赞者，赞皆跪，赞恭读圣训，乃宣太祖高皇帝圣训，曰孝顺父母，尊敬长上，和睦乡里，教训子孙，各安生理，毋作非为，钦此！赞恭读皇上圣训，乃读皇上宣谕承天府百姓曰：各要为子的尽孝道，为父的教训子孙，长者抚那幼的，幼的敬那长的，勤生理，做好人，依我此言语。钦此！赞众皆叩头，三叩头，赞兴平身，赞撤香案，赞各人复位坐，赞设讲案，赞恭讲圣训宣谕各一道，赞宾主，皆立听，二人各讲毕，赞皆坐，赞再讲敷言鹿鸣南山内二道，二人各讲毕，赞撤讲案。乡约一曰礼约宾，主约、副主约揖，约正、约副命弟子酌酒，旅献宾主，各执酒交献毕，赞各作揖，赞宾主

各饮酒，饮毕，赞各作揖，赞请众约宾就坐位，主约、副主约、约正副揖宾，皆坐。坐位以齿为次序，不论贫富贵贱，盖在乡党，宜以齿为尊也。赞行燕礼，命酌酒置于各约宾席上，及酌，举酒于主约、副主约、约正副席上。

赞工歌《皇极敷言》云：“无偏无陂，遵王之义，无有作好，遵王之道，无有作恶，尊王之路，无偏无党，王道荡荡，无党无偏，王道平平，无反无侧，王道正直，会其有极，归其有极。”赞请饮酒，约正副乃起，举手请饮，饮毕，命复酌酒，置于各宾及主约、约正副席上。

赞请歌乐宾，工歌《鹿鸣》云：“呦呦鹿鸣，食野之苹。我有嘉宾，鼓瑟吹笙。吹笙鼓簧，承筐是将。人之好我，示我周行。”赞请饮酒，主约等乃起，举手请饮酒，饮毕，命复酌酒，置于各宾、主约、约正副席上。赞请再歌，乐宾工歌《南山有台》云：“南山有台，北山有莱。乐只君子，邦家之基。乐只君子，万寿无期。”赞请饮酒，主约等乃起，举手请饮酒，饮毕。赞请宾主交酬，无筭爵。

赞请读乡约。

曰尚礼义。所谓礼义者，父子相亲，兄弟相友，长幼相爱，夫妇相敬，朋友相信，有恩相亲，有礼相接，与凡父坐子立，夫妇如宾，兄先弟随之类。《孟子》曰：徐行后长者，谓之弟疾，行先长者，谓之不弟，行路遇长于己者，则让之先行，而已随之，若遇长者来，则少者立，待长者过乃行，己若骑马遇长者，则下马或引马避之，若长者避之，则至其处下马，请出揖之。凡坐，不可分上户下户，率以齿为序。《易》曰：谦尊而光卑，而不可逾。岂不是好。凡遇冬年节，则同甲之人各相往来拜贺，有婚嫁丧葬，皆宜相吊相助，以尽其情可也。

曰恤患难。凡同甲者，义如一家之人，又如一人之身，

须要如子弟相卫，手足相顾，且如手足在一人之身，刺之则知痛，岂有不相顾之理。兄弟阅于墙外御其侮，岂有不顾卫之理。凡有疾病，必相问疗，有水火盗贼之灾，必相救援。有死丧必相吊慰。邻里有丧，舂不相杵，不巷歌。至于同甲有被人诬害，则二十四家率一乡之人共保白之。横加诬人、总甲罗织之类，必共捍之，不许入本里为害，则人人有倚为善矣。

曰立臧否。臧谓善良，否谓不善。凡二十五家同甲之内，一人为非，则共往戒之，务使不为恶而后已。一人为善，则共往赞之，务使成其善而后已。久久行之，则为不善者日消，为善者日长，为善者日长，为恶日消，不仁者远矣，是谓善俗。

曰行保甲。照得往年“总督两广新建伯王阳明公”立保甲法，予在南京参赞亦尝行之，皆仿朱文公之意，或十家二十五家为一甲，甲内互相保察，互相亲睦，务相勉为善，不许为非。甲内一人为非，九家（或）二十四家举呈乡正，闻官究治。若九家（或）二十四家不呈，则罪必连坐。若小有言语，则同甲之人，互相和解，不复斗讼，则风俗亦由之而淳厚矣。予南京参赞奏编保甲，以联人情一节有云：每二十五家编为一甲，共立粉牌一面，备书二十五家姓名、户籍、丁口及某为士、某为农、某为工、某为商。其牌轮流收管。收牌之人，每日询访二十四家出入动静。如某家行某事善，则率二十四家共赞成之；某家行某事不善，则率二十四家共阻止之。或懒惰不务生理，及因争田地相攘闹斗讼，则率二十四家共解释之，不听，则必继之以泣，务致欢乐如初可也。凡二十五家，出入相友，守望相助，疾病相扶持，二十五家之人，宛如一家父子兄弟之爱，则百姓睦矣。其有肆为不善、游手好闲者，及赌博者，与夫不务同心联属者，二十四家故纵不肯即时举正者，乡正呈官连坐责罚之。

曰躬巡省。除四仲之望会约，余于正、三、四、六、七、九、十、十二月之望，主约、副主约、约正副同乡正，巡行各甲而督察之。某甲某人为善，某甲某人为不善，某甲某人为孝为弟，某甲某人为不孝为不弟之类，以警之。读约毕，宾主皆起立，相向拱手答云：谨如约矣。复坐，赞讲《孟子》，乃讲《孟子》曰：死徙无出乡，乡田同井，出入相友，守望相助，疾病相扶持，则百姓亲睦。讲毕，司籍者以册就各约宾，密书某人某事善。又立一册，待一年之后，才密书某人某事过恶，不以示人，令其可改，若二年不改，则鸣鼓攻之矣。赞乡正举保甲中之人，曰某人为某善，某人为某恶，告毕，赞乡约礼毕，宾主起立中堂，相向作揖，主约副主约出送，约宾从西阶，主（约）从东阶，至大门相向作揖，举手别。赞复曰，宾不顾矣。

圣训约·仪注

是日夙兴，主约、副主约、约正副、乡正候于约所，宾前后至，息于祠堂，摈报齐，请出迎（主约、副主约由东阶出，约正副、乡正由西阶出），揖迎宾，宾入门右，摈二人前导（约正副、乡正从之），主人门左，价二人前导及阶，相面揖，升阶及堂。○赞鸣鼓三声，相揖升堂之中，宾西主东皆北向。○赞宾主作揖。○赞再作揖。○赞宾及乡正、约正副作揖。○赞各就位坐，啜茶。○赞宾主出听读圣训、宣谕（宾西主东，摈价引出至香案前）。○赞排班。○赞有爵者以爵次就位，约宾以齿各就位。○赞皆跪读圣祖圣训，毕；读皇上宣谕，毕。○赞叩头，再叩头，三叩头，兴平身，礼毕。○赞撤香案。○赞各入后坐位。○赞皆坐。○赞供讲案。○赞鸣讲鼓九声。○赞恭讲圣训、宣谕各一道。○赞宾主皆立听，二人各讲一道，

毕。○赞皆坐。○赞讲皇极敷言，讲毕。○赞撤讲案。○赞行献礼。主约、副主约揖，约正副命弟子酌酒旅献。○赞宾主交献，毕。○赞各作揖。○赞各饮酒，毕。○赞各作揖，弟子接受酒盏。○赞各就坐位。○赞皆坐。○赞约副举酒，献歌工及诸执事者。饮二杯，毕。○赞行燕礼。○赞弟子举酒于宾主席上。○赞请歌乐宾。歌工立于堂前云：请歌皇极敷言，遂歌敷言毕。○赞宾主各饮燕酒，毕。○赞请举饌。○赞弟子举酒于宾主席上。○赞请再歌乐宾。歌工立于堂前云：请歌鹿鸣，遂歌鹿鸣毕。○赞请饮酒。主约、副主约、约正副请宾饮酒毕。○赞弟子举酒于宾主席上。○赞请三歌乐宾。歌工立于堂前云：请歌南山，遂歌南山毕。○赞请饮酒。主约、副主约、约正副请宾饮酒毕。○赞宾主交酬，无筭爵。○赞弟子举酒于宾主席上。○赞上宾酬主约及约正副、乡正，各同饮毕。○赞弟子举酒于宾主席上。○赞众宾酬主约、及约正副、乡正。各同饮毕。○赞弟子举酒于宾主席上。○赞约正副酬宾主及乡正，各同饮毕。○赞弟子举酒于宾主席上。○赞乡正酬宾主及约正副。各同饮毕。○赞弟子举酒于宾主席上。○赞主约、副主约酬宾及约正副、乡正，各同饮毕。○赞弟子举酒于宾主席上。○赞约正副再酬宾主及乡正。各同饮毕。○赞弟子举酒于宾主席上。○赞主约、副主约再酬宾及约正副、乡正。各同饮毕。○赞撤饌。○赞供读乡约案。○赞鸣讲鼓九声。○赞读约者读约。读毕，约宾、乡正举手答曰：敬如约。复坐。○赞讲《孟子》。讲者乃讲《孟子》“死徙无出乡”一章，毕。○赞司籍者以册入，书纪善册，对众宣扬；纪过册，勿以示人，以待其改。司籍者递册遍位看一遍。○赞乡正举保甲之人善恶以告。告毕。○赞撤读约案。○赞乡约礼毕。○赞宾主俱起作揖。○赞主送宾。宾从西阶，主从东阶，四人前导至大门，相向作揖，举手别。宾复曰，宾不顾矣。

圣训约讲章

太祖圣训讲章

恭惟我太祖高皇帝圣训曰：孝顺父母，尊敬长上，和睦乡里，教训子孙，各安生理，毋作非为，钦此！何谓孝顺父母？盖生我者为父，育我者为母，父母生我育我甚是劬劳，为子必当遵依父母教训，思父母生成我，要我做好人，必体父母之心，所行必有常，所习必有业，有好衣好食必先奉父母，无得好货财私妻子不顾父母之养，便是个孝子矣。何谓尊敬长上？年高于我者谓之长，在我上者谓之上，子弟于长者之前不敢戏笑，背后不敢非毁，谦卑逊顺而致敬尽礼，谨守律法而不敢犯，早纳官粮而不敢违，是谓尊敬长上。何谓和睦乡里？二十五家为里，一万二千五百家为乡。处于乡里之中，无以贵忽贱，无以富欺贫，无以强凌弱。敬乡里之长者如敬己之父兄，爱乡里之幼者如爱己之子弟，则人亦爱敬我矣。何谓教训子孙？我生者为子，子生者为孙，子孙乃我之遗体，子孙为不善即我为不善矣。为父母者必当教子孙：说好话，行好事，做好人，朝夕审察其出入，毋与恶人交便是。何谓各安生理？生理者，人之所恃以为生之理也，安者安心为之，更无他务也，如士农工商各安其业，即各安于所恃以为生也。若游手好闲，饱食终日，无所用心，即自丧其生之理也。何谓毋作非为？人有非为如为盗贼，为光棍，为非人所为，为非子所为，为不孝为不义，如此所为则心必不忍为之，且如今之赌博正是非为之大者，试观今之逆父兄，疾妻子，斗邻里，破散祖业、穿窬淫放，莫不因赌博而致此极也。若能素戒此等而不为，则凡非为之事皆不为，则不患不为好人矣。凡乡里父老归告乡邻及家之子弟，且须戒之毋犯。

圣训所禁皇上宣谕承天府百姓讲章

恭惟我皇上宣谕承天府百姓曰：各要为子的尽孝道，为父的教训子孙，长者抚那幼的，幼的敬那长的，勤生理，做好人，依我此言语。钦此！何谓为子的尽孝道？如服劳奉养，和颜色养父母之志，即太祖高皇帝圣训孝顺父母也。何谓为父的教训子孙？父母欲为子即为之，父母不欲为子即不为，即太祖高皇帝圣训教训子孙也。何谓长者抚那幼的，幼的敬那长的？谓兄爱弟，弟敬兄，兄弟爱敬交感，即太祖高皇帝圣训尊敬长上也。何谓勤生理做好人？谓如农工商贾，为良民善众，即太祖高皇帝圣训各安生理，毋作非为也。夫我太祖高皇帝，既敷训于前，今我皇上又宣谕于后，莫不同条而共贯，仰见圣人拳拳教人以好事，故宣谕终曰：依我此言语，谓若能依皇上宣谕而奉行之，则不犯律条而必获无穷之福，所谓积善之家必有余庆；若不依皇上宣谕而任情纵恣，则必犯律条而陷不测之祸，所谓积不善之家必有余殃也。凡我同约乡宾归以告邻里宗族，各钦遵圣训，保其身家，保其子孙可也。

皇极敷言讲章

无偏无陂，遵王之义；无有作好，遵王之道；无有作恶，尊王之路；无偏无党，王道荡荡；无党无偏，王道平平；无反无侧，王道正直，会其有极，归其有极。此皇极敷言，乃商箕子陈于周武王，欲武王敷训于臣民，播之声歌，涵泳性情，以入皇极之化的说话。前无偏无陂作好恶三句，是示民以入皇道之本，后荡荡平平正直三句，是赞皇道之大，以歆动之。何谓无偏无陂？偏是不中，陂是不平，心体未尝不中正，但已私生于心，心便不中不正，难以入先王之道路大义了。故禁止民心之偏陂，则可遵王之义。何谓作好作恶？心体未尝有私好私恶，好善而恶恶，若加些意思，好恶不在物而在我，便是不出

于天而出于人，便是作好作恶不可入先王之道路了。故戒民心好恶不可有所作，则可遵王之道路矣。何谓无偏党王道荡荡，又说无党偏而王道平平，无友侧而王道正直，偏者不中，党者不公，反侧不正，荡荡广大也。平平至平也，正直无邪曲也。盖反复歌咏，赞王道之广大，平正之极以感动乎民，使民乐于趋向，而遵其义与道路也。何谓会极归极？章之末又劝皇极之民会合而趋皇道以归皇道，此是诗之体，敷言为训，使民朝夕歌之，以兴起其善心，得其性情之正，去其恶以全其善而不自知也。凡我同约之贤，宜归以此教训相邻子弟，幸同归皇极之化，为皇极之民，幸甚。

鹿鸣诗讲章

“呦呦鹿鸣，食野之苹；我有嘉宾，鼓瑟吹笙。吹笙鼓簧，承筐是将；人之好我，示我周行。”此诗是周王燕享宾客之诗，即以鹿鸣而起兴，言呦呦然其鹿之鸣而声和矣。鹿之鸣，而食野中之苹草，且鸣且食，而得其所矣。兴起我之与嘉宾情，岂有不乐耶？宾主聚会之乐，则鼓瑟而吹笙矣。不特吹笙，吹笙而又鼓簧矣。丝一竹，丝竹交奏以畅□□矣。不特吹笙鼓簧，而□□承筐以载币帛，以将诚敬矣。所以作乐致币宾礼之盛，果何为哉？盖以此嘉宾有好爱于我之心，而示我以周行也。周行谓大道也，示我大道，爱我之至，故宜礼之盛如此也。惟我约宾，皆一乡之彦，皆诗所谓嘉宾，顾不见鄙惠临见教以共成约礼，为此乡垂无疆之休焉。幸甚！幸甚！

南山有台诗讲章

“南山有台，北山有莱。乐只君子，邦家之基。乐只君子，万寿无期。”此诗是周家燕享通用之乐歌，其意则喜贤者与之共事也。始以南山起兴，谓彼南山则有夫须之台矣，彼北山则

有叶香之莱矣。顾我邦家岂无乐只之君子耶？然南山之台无益于南山，北山之莱无益于北山，而我邦家之君子则实有益于邦家也。故曰邦家之基，基根本也。德义由之而兴起，礼乐由之而修和，风俗由之而淳厚，生民倚之以立命者也。然乐只之君子，又岂徒足以基一世之邦家而已哉！由一世而十世，由十世而百世，由百世而千世万世以至于无穷焉。如所谓既竭心思焉，继之以不忍人之政而仁覆天下及后世，便是人岂有万寿者哉！然亦有一般人死而不亡者，而其流风余韵，固有旷万世而不亡者，故曰万寿无期，言至远也。夫君子足以基邦家而垂万寿，非谓其能通人已，合远迹千万世之上、千万世之下而为一身哉！以是人而与是约共是燕焉，固足以为约会之光也。愿与诸君共勉之。

孟子讲章

《孟子》曰：“死徙无出乡，乡田同井，出入相友，守望相助，疾病相扶持，则百姓亲睦。”此《孟子·告滕文公》以井田之法，正与乡约之意同。何谓死徙无出乡？死谓死葬，徙谓徙居，死葬徙居，皆无出他乡，本乡之民，生死都在本乡之内，而乡田同井者，又有相亲之义。古者井田之制，以六百三十亩之地划为九区，区七十亩中为公田，其外八家各授一区为私田，民既同乡而居，则八家必同井而耕，同井而耕则必不得舍此而他慕也。于是八家同井之人，生相亲之恩，凡出入则自相与为友，守望则自相与为助，疾病则自相与扶持。何谓友？友者，伴也。士农工商各为一业，而各以类聚，是以出入相友。何谓守望相助？守谓保守其乡，望谓瞭望寇盗，相与保守瞭望，恐或盗之自外来也。何谓疾病相扶持？疾病不能自疗者，八家同井之人则馈其药饵，助其有无，而共医疗之。夫一井之民如此，他井之民亦如此，一乡之民亦如此，百姓相视如

一家之父子，兄弟如一身之手足相卫矣。所以自相亲睦，无异于一家一身，和顺之俗成，争斗之风息矣。《书》曰：“百姓不亲，五品不逊。”今诸君子共起乡约，使同乡、同甲之人，如一家、一身之相亲，亦能出入相友，守望相助，疾病相扶持，则和气流行，是亦古者井田之遗民矣。幸共勉之。

附 录

告乡里立义阡禁焚尸帖子

予往在南京参赞，惟见本处凡父母兄弟妻子死则多焚之，于心戚戚焉。夫焚尸与炮烙之刑何异？律有明禁，且伤天地之□和，累骨肉之至爱，孰大于此者？亟为禁止。又访得此焚尸者，初出于无葬地之故，以至此耳。乃为奏闻，置义阡三十二处，于是无地之人皆有葬所，焚尸之祸乃为渐息。今察吾沙贝一乡，及白冈、东洲等处，贫者多焚其父母兄弟妻子，不知骨肉受刑，殊可痛惜。既伤和气，乃至凶荒厉殁，莫不由此而生。今买某山，立为义阡，使各近乡贫民，有父母兄弟妻子丧，则全棺葬于此山，又修白冈义阡，许贫民皆葬于此。本宅每遇清明，用三牲酒礼，遣乡正通祀义阡之无主者。以后不许焚尸，以伤和气，以犯律例。特告。

告举禁焚尸及令贫民皆葬新置义阡状子

告状人湛兴，年四十岁，系甘泉都一图湛尚书家人，告为乞给告示，禁止焚尸，令葬本宅新置义阡以变风俗事。家主旧在南京参赞，惟见本彼处□俗焚尸了无仁心，亦曾禁止，奏置义阡，以厚风俗。今者南归切见沙贝、白冈、东洲等村，但有父母兄弟妻子死者，骨肉互相焚毁，秽气熏天，大伤天和，是致灾疫风俗甚为薄恶。主思此等相焚，岂无人心，但苦无地可

葬，积习至此。今家主或价买，或捐出户管土，名冈皆觜、古牛石、石子冈及甘泉后洞口桑草原等处，各设坊门，表为义阡，仿古漏泽园之例，法先王掩骼之义，凡乡里贫人死者，俱令于此掩埋，已有帖子偏告乡里，但恐小民狃于旧习，未能卒从，尚且玩视，须以官府临之，乃能齐一。理合具状赴县主老爹台前，告乞出示禁止焚尸，着落乡正伍祖惠偏谕各甲，卒依全棺归葬各阡，以调和气，以昭盛治，生死各安。来告。

嘉靖二十三年（1544）六月初一日告

读甘泉圣训约跋

今岁中夏既望，予同杨户侯古乡拿舟三百里，历穗城，过扶胥，访泉翁湛先生于沙堤，瞻江门之钓台，入六桥之光霁，渡五湖之烟景。而造燕翼之堂，则先生同乡耆彦行圣训约之二日也。先生示予以约条读之，至再至三，礼义情文兼备矣。其遵圣训赞皇猷化乡邦之道至矣。是约也，匪直可行之于一乡，虽行之于天下后世可也。挽回太古之淳风，大哉！约乎！化民成俗，无出于此矣。盖先生又出瞻田羨余，以成兹约之资，又嘱仲子都事束之，可行诸求久而不替，将见家诗书户礼乐，人人有士君子之行。先师白沙先生诗曰：“此地还成礼义乡。”盖先兆之矣。故述此以赞其成云。

时嘉靖二十有三年（1544）岁次甲辰夏五月望后九山居士汤顿首谨跋。

甘泉沙堤乡约末语

岁嘉靖甲辰（嘉靖二十三年，1544）五月丁未，云淡来自宜兴，省师翁甘泉夫子于沙堤，拜稽甫毕，即出《沙堤乡约》以视。云淡曰：兹吾将以风吾乡也。敬读而言曰：都哉！是可以风天下矣。夫子遂集独冈精舍诸生，暨阖族诸髦演之，肃如

也。明日，夫子临精舍，命再演之，雍如也。又三日，夫子速乡族耆老行之，翕如也。云淡旁观，扬言曰：以予观于兹而知人心之自然也，以予观人心之自然而知王道之易易也。虽先王之教，湮微已久，而夫子复之，一旦人人知向，不以为非，此心自然之真从可识矣。苟强之以本，无拂之以不欲，则焉有于肃如雍如翕如哉。推此自然之同心而达之天下，兴孝以老其老，兴弟以长其长，兴慈以幼其幼，兴勤以事其事，兴志以学其学，莫不尽伦而尽制矣，于熙皞之风也何有。昔夫子夏卿参赞风南都矣。明农甘泉家训孙子风族党矣，兹约行沙堤罔有弗若干训风乡邑矣，诚积五十年之久，心传千百圣之真，风行族乡都之间，未有动而不丕应者，俾天欲康济斯世，不舍夫子举此而措之耳，何缘以逢其盛，云淡不敢阿。

是日门人黄云淡谨跋。

甘泉沙堤乡约跋

兹惟甘泉沙堤乡约也，兹吾师甘泉翁因门人伍通府克刚创义起，予遵皇敷言立约于乡，以期会归于有极者也。翁礼谢三卿，归裁狂简成，训于家而又拳拳焉。举约于乡，化家化国，并修盛典以符白沙先生四十年前期待之意矣。昔者后王降德于众兆民，乡大夫燕会传教于乡，然后法令播三物行百姓化淳。盖古先王化成之精意。□邦畿以届乎乡鄙者也。是约也，有宣圣训敷皇极讲义，声歌钟磬鼓乐，崇年尚齿，献酬揖让，有伦有要，是即古先王之世降德传教之遗意矣。夫会聚燕乐之间，上有降德，下有传教化于一乡，以化于旁乡，以化于邑郡，天下期月而可风动矣。是约也，肇所独冈，创行夏望，典刑老成，骏奔慎恪，鼓钟锵锵，歌乐洋洋，饮食衎衎，礼意皇皇，劝善惩否，仁育义正，主宾尽美，化雨春风，人皆目盛容耳。盛声向善之心不期而油然，乐善之意不期而懽然，由是不仁者

日益远矣。他日比屋可封之俗，上赞圣皇之化理，猗歟盛哉！朱方与东莞钟君景星、顺德张君世美、康君时聘、冯君望、张君熙、闽漳陈君鸣球、广右秦君孺、金陵吴君楫、宜兴黄君云淡、朱君子祥、番禺何生士能，馆独冈问学于翁，适逢其会，聿观厥成，咸为之喜而不寐，以谓盛典之成，非偶然也。其与三谟诸衍国子大科诸规，与夫甘泉家训，实相表里焉。吾将推而行之于吾桂林之墟，迺可远在兹，则翁之在乡在朝，政同俗美，太和雍熙之盛，云汉为昭宇宙为无穷矣。孰谓泉翁江湖报君之忱，讵以远而或忘耶？遂赞一言于简，裔以志斯文之庆云。

嘉靖二十三年（1544）仲夏吉日，门人守莲洞书院山长顺德周荣朱跋。

沙堤圣训约后序

愚观吾师泉翁所立圣训约而叹曰：其王道之遗乎？盖吾师天德王道之学，决自江门得千圣之精而廓如也。虽宅三卿而在南都，故格天之功未究，归罗浮裁正狂狷，复定是约，岁时率耆老行之，庶几寓王道于一乡，其亦爱君救时弗获已之意乎？盖其即周官党正属民于序，而乡大夫主之者也。其仪，坐宾于西北，即象天地严凝之气，以言乎其义也；坐主于东南，即象天地温厚之气，以言乎其仁也。宾主礼接仁义，道彰复立之，介立之，僎臣孚翼乎？仁义者也。是故其遵明时之制焉；首以读圣训、宣圣谕，盖远不忘君者也。是故其立大中之乐焉，歌以皇极，定其趋也，是故其通宾主之情焉；歌以鹿鸣，惠必归德者也，是故其致忠爱之意焉；歌以南山有台，盖德必得寿者也，是故终之以孟子死徙之章俾之相保，亲睦维之于无穷矣。若夫献及歌工与百执事，而逮下之惠，广爵有定数，不继以□，而宾主之情正，旌善有录，而乡之为善者劝，记过有薄，

而乡之为恶者惩，斟以先王之法，润以人情之通，仿乎古而不泥，准乎今而皆宜，其区画详，其规模远，其推行简且易，皆根之广大，胸中天理流出者也，而自不逾矩矣。一席之间有讲有读，贵贱以齿，宾主情洽。始焉临之者翼翼尔矣，中焉临之者与与尔矣，终焉临之者闾闾尔矣。是故有事亲之仁焉，是故有敬长之意焉，是故有慈幼之恩焉，使为子者，观之于其仁，斯老老之心勃如矣；为弟者，观之于其义，斯长长之心沛如矣；为长者，观之于其恩，斯幼幼之心鬯如矣，老老则莫（下缺）。

（徐林整理）

二、“刘晨所旧本抄录”——乾嘉时期


广东珠江三角洲佃种屯田文献

为遵批呈明事，蚁等耕种屯田中，有禾虫鸭埠微利，禾虫期岁秋九月，每出三朝，鸭埠牧养，冬收遗粒方赖践食，与海港常利迥别。因蚁等田瘠粮重，每遇科场拨应军丁四百余名回籍邦办，往返盘费。案历据乾隆元年（1736）恩旨免租，归于贫民，屯田之禾虫鸭埠仍给蚁等管业，即旧岁科场籍租供役无□（误）。因州府查详，未及分别，屯涌向无列册，禾虫概归附近蛋民捞采，特付屯埠系蚁等耕种田内沟洫，以备旱涝潮（涨），况附近无蛋□（民）同□□，且南海里民谭祝长、任少同等陈请鱼□茸三了桑园等围，恩准在案，蚁等科场供役，事异辙同，九月初三日补牍奏天奉批，禾虫鸭埠，原议照地管业，尔等是否现在耕种其地屯田查批呈明等谕。只得历稟并粘单开现耕种土名田呈阅，叩乞一体施仁，恩准行县□□□□公践屯顶祝。

乾隆四年十一月初三日递计粘开现在耕种土名田涌一纸。



《圣训约》插图一



《圣训约》插图二